

UNIVERSITI TEKNOLOGI MALAYSIA

UTM.J.08.00/10.12/2 Jld.9 (28)

16 April 2020
22 Syaaban 1441

PEKELILING AKADEMIK BIL. 4/2020 JABATAN TIMBALAN NAIB CANSOLOR (AKADEMIK & ANTARABANGSA)

PENGURUSAN AKTIVITI PEMBELAJARAN DAN PENGAJARAN BAGI SEMESTER 2 SESI 2019/2020 SEMASA KRISIS PANDEMIK COVID-19 BAGI PELAJAR PRASISWAZAH DAN PASCASISWAZAH

Universiti Teknologi Malaysia (UTM) melalui Mesyuarat Senat Khas Bil. 2 2019 /2020 pada 2 April 2020 telah meluluskan pelaksanaan aktiviti Pembelajaran dan Pengajaran (PdP) secara fleksibel melalui kaedah dalam talian dan jarak jauh (DTJJ) semasa krisis pandemik Covid-19 bagi pelajar prasiswazah dan pascasiswazah. Berikut adalah perkara yang telah diputuskan:

1. Pelaksanaan Pembelajaran dan Pengajaran (PdP) Secara Dalam Talian dan Jarak Jauh (DTJJ).
 - 1.1. Semua kursus perlu dilaksanakan secara DTJJ mengikut kesesuaian dan berdasarkan Pekeliling Akademik Bil.1/2020: GARIS PANDUAN PEMBELAJARAN DALAM TALIAN SEMASA COVID-19. Pelaksanaannya adalah berdasarkan kalendar akademik baharu yang telah diluluskan oleh Senat pada 2 April 2020.
 - 1.2. Penggunaan kaedah PDP secara DTJJ adalah diutamakan untuk tujuan syarahan, tugas, projek pembentangan manakala kaedah alternatif DTJJ juga diutamakan untuk tujuan amali, pembelajaran servis serta pentaksiran termasuk peperiksaan akhir dan seumpamanya. Pendekatan PDP, termasuk pentaksiran alternatif secara DTJJ ini boleh dilaksanakan sehingga tamat minggu pengkuliah Semester II Sesi 2019/2020.
 - 1.3. Peperiksaan akhir secara bersemuka hendaklah dilaksanakan dalam tempoh minggu peperiksaan akhir Semester II Sesi 2019/2020 dengan kelulusan Jawatankuasa Akademik Fakulti (JKAF). Fakulti yang merancang untuk melaksanakan peperiksaan akhir secara bersemuka hendaklah juga membuat persiapan untuk melaksanakan pentaksiran alternatif bagi peperiksaan akhir, sebagai ganti sekiranya kaedah bersemuka tidak dapat dilaksanakan andai kata krisis COVID-19 yang berpanjangan.

- 1.4. Jawatankuasa Akademik Fakulti (JKAF), hendaklah memastikan supaya pelaksanaan pentaksiran alternatif dan peperiksaan akhir melalui proses piawaian jaminan kualiti sebagaimana yang ditetapkan oleh Universiti.

2. Pelaksanaan Kursus Yang Memerlukan Kehadiran Fizikal dalam tempoh sepanjang semester II sesi 2019/2020 dan/atau semester pendek sesi 2020/2021.
 - 2.1. Bagi aktiviti PdP yang memerlukan kehadiran secara fizikal seperti bengkel, makmal, studio, projek sarjana muda, projek penyelidikan, pembelajaran servis, dan lain-lain; aktiviti PdP berkenaan boleh diselesaikan bermula 31 Mei 2020 sehingga akhir tempoh pengkuliah Semester II Sesi 2019/2020, tertakluk kepada Perintah Kawalan Pergerakan dan pmatuhan terhadap prosedur keselamatan.

 - 2.2. Sekiranya kursus seperti dalam 2.1 tidak boleh diselesaikan dalam tempoh sehingga hujung minggu peperiksaan akhir Semester II Sesi 2019/2020, atau sekiranya Perintah Kawalan Pergerakan dilanjutkan; dan/atau memerlukan tempoh masa yang lebih panjang, ia boleh diselesaikan dalam tempoh semester pendek (atau semester III, bersamaan dengan tempoh dengan cuti Semester II Sesi 2019/2020). Markah kursus tersebut akan diberikan status Kedudukan Tidak Selesai (TS). Pelajar perlu mematuhi had maksimum beban pengajian bagi semester pendek sebagaimana yang terkandung dalam Peraturan Akademik.

 - 2.3. Sekiranya, masih terdapat kursus yang tidak dapat diselesaikan dalam tempoh semester pendek Sesi 2019/2020, Kedudukan Tidak Selesai (TS) akan diberikan sehingga kursus tersebut dapat diselesaikan pada sesi berikutnya dengan kelulusan Jawatankuasa Akademik Fakulti (JKAF). JKAF perlu menetapkan tempoh masa untuk pelajar menyelesaikan kursus yang berkaitan mengikut kesesuaian serta perkembangan pembelajaran pelajar.

3. Jawatankuasa Akademik Fakulti boleh meluluskan pelaksanaan kursus secara **HADIR WAJIB (HW)** bagi Semester II Sesi 2019/2020 hanya untuk kursus berbentuk latihan industri yang bergred sahaja.

4. *Professional Skill Certificate* (PSC) diberi pengecualian khusus bagi kohort yang akan bergraduan pada Semester II Sesi 2019/2020. Pelajar hanya dikehendaki menyediakan *resume bertulis, video resume* dan digalakkan membina e-portfolio dan profail LinkedIn.
5. Pelaksanaan Mobiliti Semester II 2019/2020 adalah seperti berikut:
 - 5.1 Bagi pelajar mobiliti di Institusi Pendidikan Tinggi (IPT) lain di dalam dan di luar negara, mereka boleh mendaftar semula kursus yang telah diluluskan untuk mobiliti di UTM; dan sebahagian markah yang telah diperolehi di IPT berkaitan boleh dikira untuk tujuan pengredan dengan kelulusan Dekan dan Timbalan Naib Canselor (Akademik dan Antarabangsa).
 - 5.2 Bagi pelajar IPT lain yang mengikuti program mobiliti di UTM, mereka dibenarkan untuk terus mengikuti kursus sedang dijalankan. Sekiranya mereka membuat keputusan untuk meneruskan mengikuti kursus berkaitan di universiti sendiri, sebahagian markah yang diperolehi oleh pelajar tersebut boleh diberikan kepada IPT berkaitan untuk tujuan pengredan dengan kelulusan Dekan dan Timbalan Naib Canselor (Akademik dan Antarabangsa).
 - 5.3 Pelajar yang sedang mengikuti kursus pada Sesi 2019/2020 juga dibenarkan untuk menyempurnakan aktiviti PdP di Institusi Pendidikan Tinggi yang diktiraf oleh Senat dan boleh memohon Pindah Kredit Secara Horizontal. Kursus tersebut perlu ditukarkan kepada status KM bagi pelajar prasiswazah.
6. Mana-mana pelajar yang menghadapi kesulitan, termasuk pelajar pada semester maksimum yang tidak dapat meneruskan pengajian akibat krisis Pandemik Covid-19 boleh memohon penangguhan Semester II Sesi 2019/2020. Penangguhan semester akibat krisis Covid-19 tidak akan diambil kira dalam tempoh pengajian. Tarikh akhir untuk memohon penangguhan pengajian adalah 15 Mei 2020.

7. Universiti boleh memperakukan gred pencapaian pelajar yang diberikan oleh pensyarah sebagai memenuhi keperluan kredit sekiranya pelajar telah memenuhi keperluan pembelajaran dan penilaian pelajar (sama ada yang melibatkan penggantian atau tidak diganti) yang memenuhi sekurang-kurangnya 70% keperluan jam pembelajaran pelajar (SLT) dan hasil pembelajaran sepertimana saranan Agensi Kelayakan Malaysia (MQA) dan tertakluk kepada garis panduan badan profesional program berkaitan.
8. Tarikh baharu untuk Tarik Diri (TD) dari kursus bagi Semester II Sesi 2019/2020 mengikut kalendar akademik terbaharu adalah pada 15 Mei 2020.
9. Segala keputusan dalam pekeliling ini adalah terpakai untuk pelajar UTM yang meliputi semua peringkat pengajian mengikut kesesuaian, termasuk pelajar di bawah program kerjasama.

Sekian, terima kasih

“BERKHIDMAT UNTUK NEGARA KERANA ALLAH”

Saya yang menjalankan amanah,



(PROF. Ts. Ir. DR. ZAINUDDIN BIN ABDUL MANAN)

Menjalankan fungsi Timbalan Naib Canselor (Akademik dan Antarabangsa)

- Sk
- Naib Canselor
 - Timbalan Naib Canselor (Pembangunan)
 - Timbalan Naib Canselor (Penyelidikan dan Inovasi)
 - Timbalan Naib Canselor (Hal Ehwal Pelajar)
 - Pendaftar
 - Pro-Naib Canselor (Kampus UTM Kuala Lumpur)
 - Pengarah Pusat Penyelidikan UTM Pagoh
 - Pegawai-pegawai Kanan/Dekan/Pengarah

Sekiranya terdapat perbezaan maksud dalam Pekeliling ini Versi Bahasa Melayu akan diguna pakai